

gens, & trouué prés d'un boisseau de lettres, qui s'adressoient à des particuliers d'Angleterre, on conclud qu'ils ne pouuoient estre forbans, bien que leur congé ne fust que trop vieux obtenu, & qu'on eut trouué quelques boettes de poison dans leur coffre, qui eussent pû faire soupçonner de mauuais dessein, attendu qu'outre qu'ils estoient peu de monde, & encore fort foiblement armez, ils auoient quelques charte-parties, puis toutes ces lettres les mettoient hors de soupçon de ce costé là, & par ainsi furent renuoyez en leur Nauires * quittes & absous, apres nous auoir accompagné les trois iours consecutifs qu'on fut à consulter leur affaire.

131 Le me recreois par fois, selon que ie me trouuois disposé, à voir ietter l'esuent aux Baleines, & ioüer les petits Balenots qui se recreoient en temps calme, d'une façon fort plaisante. Les grandes Baleines desquelles i'ay veu une infinité, particulierement à la Baye de Gaspey, nous importunoient plus qu'elles ne nous recreoient par leur * soufflemens & les diuerfes courses des Gibars apres elles, qui nous estoit une interruption de repos sans remede. Gibar est proprement le masle de la Baleine, auquel on a donné le nom de Gibar, pour une bosse qu'il semble auoir, ayant le dos fort esleué, où il porte une nageoire. Il n'est pas moins grand que les || Baleines, mais non pas si espais ny si gros, & a le museau plus long & plus aigu, & un tuyau sur le front, par où il iette l'eau de grande violence, quelques uns à ceste cause l'appellent souffleur.

Toutes les femelles Baleines portent & font leurs petits tous vifs (non pas en masses ou en œufs comme